

բայց՝ զիջանելով նորա թախանձանքին՝ պահեց նորան բանտում:

172 թ. Հարուն Ռաշիդ յետ կոչեց Եզիզ Ի. Մազեադին Հայաստանից եւ նորա տեղ դրեց Օբայդաւաճ Ի. Մահգիին:

176 թ. Հարուն նշանակեց Ֆադլ Ի. Եահային կուսակալ Ջաբալի, Տաբարիստանի, Դմբաւենդի, Կումիսի, Հայաստանի եւ Ատրպատականի վերայ:

182 թ. Ֆադլ Ի. Եահայ կնութեան առաւ խաքանի՝ Խաղարաց թագաւորի՝ դուստրը, որը սակայն մեռաւ Պարտաւում: Նոյն ժամանակ Հայաստանի կառավարիչն էր Սայիդ Ի. Սալմ Ի. Բոտայբայ Բահլի:

184 թ. Խաղարը արշաւեցին խաքանի դստեր պատճառով Բաբ-էլ-աբւաբից, յարձակեցան (Հայաստանի սահմաններում ապրող) մուսլիմների եւ քրիստոնեաների վերայ եւ գերեցին նոցանից աւելի քան՝ ինչպէս պատմում են՝ 100.000 մարդ, երկրին հասուցանելով այնպիսի աղէտներ որոց նմանը իսլամութեան (պատմութեան) մէջ տակաւին լուած չէր: Ռաշիդ դրեց Հայաստանի եւ Ատրպատականի վերայ Եզիզ Ի. Մազեադին կառավարիչ, տալով նորան ուժեղ զօրք, իսկ խուլայմայ Ի. Խաղիմին ուղարկեց Մծբին՝ Հայաստանի բնակիչներին օգնութեան:

185 թ. Եզիզ Ի. Մազեադ վախճանեցաւ Պարտաւում: Հարուն նշանակեց նորա տեղ Ասադ Ի. Եզիզին:

205 թ. Մամուն ամիրապետը դրեց Իսայ Ի. Մուհամմեդ Ի. Աբուխալիդին կառավարիչ Հայաստանի եւ Ատրպատականի վերայ, որ պատերազմեցաւ Բաբեկի հետ:

209 թ. Մամուն նշանակեց Սադաբայ Ի. Ալի Մարուֆ Բազուրաքին կառավարիչ Հայաստանի: